

合肥縣志卷第四

賜進士出身廬州府合肥縣知縣左輔纂修

山水志

水利

圩墟附

大蜀山 在城西二十里山形屹然孤特爾雅釋山云獨者蜀是也遠見二百餘里爲一城之鎮江南通志云山之中幹以河爲限其岐分中支自河南之桐柏山東南爲大蜀小蜀爲天柱而諸山在江南北者又從分支縷析焉舊志云上有唐開福寺及淵濟龍王廟或云宋董淳有賦未見

小蜀山 在城西四十里當大蜀山西二十里爲大

蜀支山

雞鳴山 在城西北三十五里三國魏新城故址在
山東北今肥河自將軍嶺發源經山北東下舊志云
上有龍井今廢

昆崙山 在城西四十里當小蜀山北雞鳴山南或
云此龍脈正幹由三向廟分而東行過此結於大蜀
山

土山 在城西北四十五里當雞鳴山北蓋亦蜀山
餘脈山南水向東南流山北水向西流仍自南轉東
皆歸肥河山上有廟廟後有泉

以上西北五山形皆孤峙而勢仍連屬

大瀛山 在城西南一百里東爲龍鳳口山疑爲天
柱分支故與同名山頂有泉清冷不涸上有眞武廟
蓮花山 在城西南一百十里舊志云上有石鑿蓮
花今無

周公山 在城西南七十里舊志云上有周瑜廟爲
瑜讀書處今廢

千字山 在城西南七十里舊志載有樊噲墓非

馬鞏山 在城西南七十里舊志云以形名

紫蓬山 在城西南七十里一名李陵山舊志云肥

水出焉上有李陵廟今肥源已涸

石佛山 在城西南六十里東卽竹林關舊志云山頂有三石佛今不存

以上大瀾至石佛西南七山又大瀾山南之祁雨山迤東之獨坐山東西方虎山羊虎山連峯絕續緜延四十餘里悉大瀾分支或爲水所經所源則皆因水附見不更繁列

姥山 在城東南百里巢湖中一名聖女山上有聖妃廟詳祠祀明崇禎間知府嚴爾珪建塔今猶存山東有石塘皆大石堆成中容千艘元末俞通海等結

寨湖中築此以藏水軍

舊志云宋晉安王子勛攻廬江沈攸之等大破之
追至姥山非也子勛兵未嘗攻廬江攸之破其兵
在赭岸爲今太平府繁昌縣地山乃慈姥山在太
平府北其地皆在江南無緣至此也

孤山 在巢湖中當姥山西

舊志云魏邢巒破梁將桓和於此亦非也通鑑天
監五年巒遣統軍樊魯破桓和於孤山胡三省注
在蘭陵郡爲今徐州府地今徐州府西北有孤山
東北又有張孤山未知孰是要於此無涉

鞋山 在巢湖中當姥山東與姥山孤山皆在合肥縣境內

四頂山 在城東南七十里一名四鼎爲邑名山俯瞰巢湖上有四峯突起唐羅隱游四頂山詩一山分四頂三面瞰平湖蓋實境也山南崖有石如鸚鵡名鸚鵡石舊志云白狗仙人得道處上有煉丹池詳古蹟

雞嶺山 在城東南七十里當四頂山東南在中廟之東

青陽山 在城東六十里元余忠宣公讀書處

黃山 在城東南九十里山接巢縣界有泉四時不竭亦名龍泉山非連含山縣之東黃山也

方山 在城東六十里當青陽山北山頂四平故名山十餘里北口爲昂家冲南爲油坊杜東西壁立別無旁蹊土人曾避兵於此

龍泉山 在城東五十里當梅子山東山頂有泉回繞僧寺四時不涸山下居民分八晝夜輪灌田畝梅子山 在城東五十里當方山北與方山竝列中爲澗

浮槎山 在城東八十里爲邑名山一名浮巢又名

浮閣山頂有甘泉宋嘉祐中郡守李謹以遺歐陽修
修爲作記記載集文

東黃山 在城東北百二十里連含山巢二縣界其
峯三百六十周二百餘里境在含山當得十之六七
南至四頂西接浮槎北至大龍蓋亦此山支派分衍
合肥約得十之二三道家以爲第十八福地上有金
庭洞可容三百人故又名金庭山又有紫微洞居民
引洞泉以溉田故又名紫微山皆不在合肥境內又
傳古王喬居此故又名王喬山亦名仙踪山含山之
後河出焉後河亦滁河之分源也

伏羲山 在城東七十里上有伏羲廟故名卽浮槎別峯也

自浮槎南至雞嶺七十餘里山勢連絡東屬巢縣皆以山嶺爲界

小峴山 在城東北七十里南史云齊蕭懿屯小峴禦王肅梁韋叡侵魏拔小峴俱此山山在浮槎北其側有道通全椒爲餘峴口山旁有城詳古蹟

大龍山 在城東北百里小峴山北又浮槎山南有火龍山北近定遠界有小龍山東北接全椒界有石龍山蓋以山勢自南而北蜿蜒如龍故名

元祖山 在城東北百五十里接滁州界

凡東山南自四頂北極元祖共二百餘里連縣絕續山非甚著概不繁列分見於圖

濬山 在城內祝穆方輿勝覽濬山州治所據言舒之濬山其二支至此而伏余忠宣公修城隍廟碑銘云天作濬阜卽此

龍幹 由六安州入境東過大濬山龍鳳口至周公山北分龍廟北轉至焦婆店又北行至白家店又東北行至三向廟分爲二一迤南轉東入西平門一大幹北行屈曲至將軍嶺轉西北入壽州

按龍幹非山以地形隆起如脊卽山脈蟠結流行之處與隴道相似俗名龍幹亦水源所由限而分流不能相通者故載之

肥水 源出將軍嶺分水田東流卽水經所云施水也東行十里過雞鳴山北會長岡店東水又東行五里經新城南會土山北水又五里會張河陂水又五里過董家鋪橋會大蜀山北水又東十五里至城西水西門外過肥寧橋遶城北過拱辰門外拱辰橋東南循城至城東過威武門外弔橋經水關過通津橋出王公閘屈曲東南行會城東南北諸水二十里至

三汊口會店埠河五里至梅龍壩會龍泉山水五里
至馬家渡會大蜀山南水南出施口歸巢湖別枝自
水西門外二里三汊河口分流北行五里過四里河
橋又十里過高橋又西北行三十五里過鳳皇橋又
西行七里至土山南水經注云施水又東分爲二水
枝水北出焉疑卽此也

爾雅釋水云歸異出同肥水經云肥水出九江成
德縣廣陽鄉西注云肥水出良餘山俗謂之連柳
山酈氏蓋溯肥水之源爲今之紫蓬山也若廣陽
鄉蓋卽今之將軍嶺也自是而西乃別北過其縣

西入芍陂過壽春縣東以北入淮此西行之肥也
水經又云施水又從廣陽鄉東南入於湖施水于
經先未特見而以又從爲言則施水卽肥水因從
將軍嶺分流東出遂別名爲施注所云北流分爲
二水施水出焉是也注又云施水又東分爲二水
枝水北出焉下注陽淵注又云肥水又北逕獲城
東又北逕荻江東又會施水枝津首受施水於合
肥縣東西流逕成德縣注於肥水是肥與施旣分
復合乃所謂合肥者也注又云肥水又北合閭潤
水上承施水於合肥縣北流逕遼道縣西水積爲

陽湖是施水之枝津北出而仍西流故能與肥合也荻江卽荻邱又有荻城其地皆當相接梁書晉通五年裴邃自合肥拔魏荻城邃本傳作荻邱漢合肥古城在今城北約當在荻城東而成德縣又當在荻城北晉之遠道本漢魏之遠適劉宋改愼其城當在今舊梁縣西北四十里今欲於此西求水可當陽湖者未得也酈注於施水下云城南居四水中四水者西爲肥水經流南爲施水經流東爲逍遙津北爲施水枝津酈注又云夏水暴長施合於肥蓋古縣地勢西南最高西北爲下北之西

又高於北肥水經流出古縣西而施水枝津出古縣北水大則枝津自北而西故云夏水暴長施合於肥也夫水經止云肥與施同出廣陽鄉而異入正得爾雅出同歸異之旨注乃加言施水枝津西流注肥證成合肥名縣之義雖特伸經外之意實與經義不同今合肥西境自紫蓬山至將軍嶺以南肥源不可復見故江南通志云已湮塞而將軍嶺以北其水在合肥境者因爲高岡所限類皆西源東流迤南而注巢湖與注說又似相戾然道元親登八公山則此地之本當亦其所目覩不爲虛

語豈古今水道既多變易而地之陵谷高下亦有不常歟

長岡店東水 東南行二十里至雞鳴山入肥水

土山北水 源出山北西南行十里分爲二一由栗樹店東一由瞿都督墓西俱南行至新城南十里入肥水

張河陂 源出土山南行二十里過陂橋又南行十里入肥水

土山南水 源出山南東行入肥水枝河

西十五里河 源出大蜀山北東北行十里過河橋

又北行十里過董家舖入肥水

大安橋北水 董家橋北水 無源皆在先農壇西

聚水南行至胡家淺下入肥水

金斗河 唐杜刺史作斗門引肥水入金沙灘故名

由西水關東注匯諸池圩水池迤南爲箏笛浦過謝家壩爲藏舟浦又東過蜀源橋惠政橋鎮淮樓橋九獅橋出東水關明正德時知府徐鉦塞西水關河漸淤淺

九曲水 無源在德勝門內匯城西諸水東過回龍橋永樂橋會仙橋聚仙橋折北過昇仙橋洛水橋河

平橋指揮橋至藏舟浦入金斗河

小史港 無源匯城東南諸水過時雍橋入金斗河

餘詳古蹟

寶家池 無源或云卽逍遙津在城北匯諸水過飛

騎橋入金斗河

皇陵廟南水 源出廟西南行五十里過北門外板

橋又南東行過觀德卽官渡橋入肥水

摸螺河 源出橋西北五里蔡家堰過河橋又十里

合皇陵廟水

北十五里河 源出橋西五里過河橋又東行十五

里亦合皇陵廟水在摸螺河南十里

七里橋水 有二源一出劉家墩一出張家凹合流而東過上七里河橋五里至中七里橋又五里至下七里橋又南行十五里過坡岡橋又南行八里過武家橋又八里至河上口入肥水

五十里岡水 源出岡凹東南行過十五里河橋又南行合七里橋水

三十埠東西水 無源皆聚水南行合爲一道過趙家橋又西南行十里合七里橋水

南十五里河 源出大蜀山東南東南行十五里過

上十五里河橋東行五里過梳背橋又東行五里過中十五里河橋東南行十五里過大板橋十五里過陸家橋又過許家橋至馬家渡入肥水

龍泉山水 源出山東南西行十里至橋頭集西行爲袁張蕩又西爲清水壩共二十里過石板橋又西南二十里過板橋至梅龍壩入肥水

黃鱣壩水 源出長樂集南西行二十里在馬家渡上入肥水又壩南水出壩南五里西行二十里在馬家渡入肥水

以上入肥水之水凡十九

店埠河 源出圓疿鎮西南三里由圓疿橋東流八里南轉仍東南流過永安橋又十二里經店埠鎮過通濟橋又南行會東土山諸水十五里至撮城鎮北過曹公橋東南行十五里至三汊口入肥水

唐陽橋水 無源聚水南行過橋又七里過傅子橋又三里過子孫橋又東南轉西共十六里過馬家橋入店埠河

東土山水 源出山北西行二十里分爲二有雙橋各過一橋仍合南行五里合唐陽橋水

梅子山西水 源出山西五里西行十里合東土山

水

梅子山南水 源出山南西行十五里過宣家壩又西過袁官橋過沙溝橋入店埠河

以上入店埠河之水凡四

派河 匯周公山李陵山大蜀山小蜀山及山左右諸山水至上派河鎮過太平橋東南行十五里至中派河渡口又東行十五里至下派河口歸巢湖

周公山水 一出山東東北行十五里名苦驢河一出山北東北行十五里過尚家橋至三乘寺橋合流又十五里過城西橋又轉東行三十里至上派河鎮

過太平橋爲派河經流

方家橋河 源出李陵山西東北行二十里過河橋
又十里至城西橋東合周公山水

竹林關西水 源出李陵山東東南行三十里合周
公山水

千字山水 源出山東東北流三十里過石佛寺北
又東北十里合周公山水

大蜀山水 源出山西南南行二十里至上派河鎮
入派河

崑崙山水 不一源皆出山南總爲二道東南行十

里過許家橋又五里合爲一水又五里合大蜀山水
小蜀山水 源出山南行十五里過李官橋又十里
合周公山水

棗林岡水 岡西北二水東北一水皆源出龍幹東
東行合一又轉西南十餘里合周公山水

以上入派河之水凡八

三河 一源出六安州太行山至雙河入縣境東行
歷界河下界河共六十里入舒城縣境十里至桃城
鎮過浮橋又東十五里仍入縣境又東二十里爲豐
樂河又東二十里會南北諸水至三河鎮又東南十

五里至南河鎮又東五里至橫溝歸巢湖一源出舒城縣西山東北行至韋處士墓東清水河入縣境會豐樂河至三河鎮同歸巢湖一源出廬江縣馬槽山北行至小戴橋入縣境會豐樂河至三河鎮同歸巢湖

蓮花山水 源出山南南行三十里過斗岡橋又十里入界河

平橋水 源出龍鳳口東十餘里龍幹南南行五里過平橋十里經獨坐山口過馬埠寺橋爲洋泗河又轉東南行三十里爲龍潭河又五里至舒城縣境又

五里過浮橋歸豐樂河

祁雨山水 不一源於山南會流東行七里過葉氏婦橋又東南行三十里合平橋水

東方虎山水 源出山東南東南行二十里至舒城縣境又十五里入豐樂河

羊虎山水 源出山南北共二十餘道總爲二流東北行過歇馬汎南北二橋又五里合流又十五里至方家橋又十五里入豐樂河

雙棗樹水 無源聚水東南流二十里分流入雙港以上入三河之水凡六

雙港橋水 分三河水至新河口歸巢湖

桃花橋水 源出大蜀山正南東南行十五里過桃

花橋又東南行五里過蔡家橋又東行八里過馬大
夫橋又十五里過韋家橋五里過下韋家橋至段家
壩歸巢湖

侯家岡水 源出大蜀山南東行十五里至湯家店
八里過清水沖橋至北港口歸巢湖

大慈橋水 無源聚水東流過柏方橋楊家橋車家
渡共三十里至永樂港歸巢湖

唐家橋水 無源東流三里過橋又三里過殷家橋

又十里入大慈橋水

百子河 源出青陽山北西南行二十里歸巢湖

長寧河 源出青陽山南西南行十五里歸巢湖

潛溪河 有二源一出黃山西一出雞嶺北合流西南行二十五里歸巢湖又南有赤壩河又南有六汊河皆不十里歸巢湖

以上逕歸巢湖之水凡十

巢湖 在城東南六十里周四百餘里爲府之巨浸占無爲合肥廬江巢四州縣合肥則東至中廟南至三河當湖西北隅奄有姥山孤山鞋山蓋得湖三分

之一凡境內西南東水多歸焉

巢一作灤又作焦以音通本古歷陽之都亦古巢
國地淮南子云一夕反而爲湖 高誘注云老嫗
走上北山耆也漢無巢湖名後漢明帝紀云巢湖
出黃金宋范蔚宗追書也三國吳志云鄭寶在巢
湖擁眾萬人廬江九江人依之吳魏相攻孫權以
箭重迴舟皆在此湖

輿地紀勝云古者巢湖水北合於肥河又云金城
河在合肥縣西九十里故魏窺江南則循渦入淮
自淮入肥由肥而趨巢湖吳人撓魏亦必由此厥

後肥河湮塞不復通於巢湖司馬遷曰合肥壽春受南北湖蓋此水也按此說非是爾雅歸異出同肥出同源之一歸異流之分分則不能合理固然也水經肥水出成德縣廣陽鄉西北過壽春縣東北入於淮下卽云施水又從廣陽鄉東南入於湖經於東南流之肥別名爲施而入淮入湖較然各列是湖能與東南之肥合不能與西北之肥合也卽酈注云肥水又北逕狄江東又會施水枝津是施與肥合非肥與湖合也且酈注又云夏水暴長施合於肥卽施之合肥亦蹇而不常則湖之不合

於肥明甚也且金城河止爲肥水所經不通舟楫
考之水經由是別北過其縣西北入芍陂若魏舟
師自淮入肥由肥趨巢湖必取道芍陂溯金城河
入施水而後可而芍陂障蓄諸水設砦啓閉無津
港可通楚相故蹟今猶可見非舟師可入又明甚
也漢書合肥壽春受南北湖紀勝作酈注積而爲
湖謂之芍陂肥水西北注芍陂施水東南注巢湖
所爲受南北湖合肥受南壽春受北語意亦分而
未嘗合也紀勝不知肥水如何入淮又不辨肥施
之異同率爲此論故附及之

西肥水 源出將軍嶺分水田分流西行二十里過

永濟橋會南北諸水經鐵索澗爲金城河北入壽州
西北入淮

寶教寺南水 源出寺南西南行二十里過萬家橋
又五里入西肥水

金家橋水 源出大瀟山西西北行三十里過金家
橋又二十里至六安州境達壽州入西肥水

胡家橋水 源出大瀟山北北行十五里過胡家橋
又五里過六合橋又五里過龍泉橋又二十里過長
城西橋轉西北行過吳家橋柳條灣橋入西肥水

獾墩橋水 源出平地，在龍鳳口東北十餘里。龍幹北北行二十里，過獾墩橋，又七里，合胡家橋水。羅田埠水 源出羅田埠，東北行十里，過尚家橋，又十五里，過長城東橋，又西轉十里，與胡家橋水合。以上入西肥水之水，凡五。

滁河 源出黃泥段平地，在今梁縣鎮西北二十里。東南經梁縣鎮，東行四十里，過張家橋，又三里，過社子橋，又八里，過武家橋，經石梁鎮，東二十里，入全椒。縣界過六合縣，由瓜步入江甯。宇記：滁水出慎縣西，暴禿古塘，卽今黃泥段也。宋之慎縣，卽古之浚遼縣。

故水經注云水出浚適縣今爲舊梁縣地

陷湖陂 在城東北七十里凡龍城北數十里內水俱匯於陂陂水北過別虞橋又北至梁縣東十里卞家灣入滁

石塘橋水 在城東北七十里水由塘橋北行十里過鳳皇橋至薛家菴入滁凡浮槎山西北諸水俱歸石塘橋水

東黃山西水 源出山西南五里過磚背橋又十里過大觀橋至陳四灣入滁

東黃山東水 源出山東北五里過魯家橋至趙家

埠入滁

護城南水 源出驛南二里過梅子橋南行五里入滁

護城北水 源出王家橋東三里過橋七里過邵家橋又七里過吳戈橋又七里過游塘橋南入滁

諸佛寺前水 源出寺前屈曲東南行十餘里經魚背灣又南行五里過太平橋十里經呼雷山又匯劉興集小龍山諸水十里過夏家橋東行入滁

滁州小馬廐水 源出滁州自州境西王集西南流至縣內白塔院山西又東南流三十里至紅山店入

滁

以上前四水由滁河南入滁後四水由滁河北入

滁凡八

朱家巷水

源出巷南里許岡凹東西北行至壽州

歸淮

白家河

源出平地西北行至壽州歸淮

皇陵廟北水

源出廟後西北行五里經海寶集橋

至壽州歸淮

麻埠橋水

橋在城北百三十里源出定遠縣西流

羊山至麻埠橋九十里與合肥以水爲界東經黃塘

湖仍入定遠界歸淮舊志以爲由含山縣入江非是
七里岡水 源出岡凹東北行十五里至廣常集過
太平橋又十里過清水橋又二十五里入麻埠河
甯家廟水 源出廟後東北行二十里合七里岡水
入麻埠河

以上歸淮之水凡七

按縣境東南歸巢湖之水肥爲大店埠派河次之
西北東北歸江淮之水西肥滁二水爲大皆經流
也小水數十異源分入悉附經流至南之三河北
之麻埠流入本境小水分入及逕歸巢湖淮者悉附

列焉

水利

金斗河 在城內灌田百餘畝

以上城內

百子河 在城東五十五里灌田千畝

烏柏壩 在城東六十里灌田千畝

長寧河 在城東六十里灌田數千畝

孔源五大塘 在城東六十里灌田三百畝

富家壩 在城東六十里灌田三百畝

長壩蕩 在城東六十里灌田三百畝

盛寧沖 在城東六十五里灌田四百畝

張家塘 在城東六十五里灌田三百畝

陸家阪閘

卽潛溪河

在城東六十五里灌田四百畝

朱王蕩 在城東六十五里灌田五百畝

牛背塘 在城東六十五里灌田四百八十畝

六車陂 在撮城西四里灌田七百畝

草塘陂 在撮城東二里灌田四百畝

宣家壩 在撮城南三里灌田千餘畝

老壩

卽撮城河

在撮城南十里灌田數萬畝

以上東鄉

包公池 在南薰門南灌田無畝數

潮城塘 在城南三十里無地名灌田三百畝

英家河 在城南三十五里通豐樂河灌田無畝數

胡家大塘 在城南三十五里灌田三百餘畝

石邱堰 在城南四十五里上派河東灌田無畝數

馬塘 關陂塘 皆在城南四十六里中派河北眾

姓灌田百五十畝

清明塘 在城南五十里今爲田

大官塘 在城南六十里灌田二百餘畝

小官塘 在城南六十里今爲田

大豐塘 在城南六十里今爲田

永安塘 在城南六十三里灌田三百餘畝

竹陂塘 在城南六十五里今爲田

周家官塘 在城南六十八里灌田二百餘畝

大龍塘 在城南七十里今爲田

關塘 在城南七十里無地名施姓灌田百六十畝

黃龍塘 三墩塘 皆在城南七十五里今爲田

小南塘 在城南八十里今爲田

神靈溝 在城南八十五里通三河灌田無畝數

以上南鄉

護城河 在西平門左一名樓河以稻香樓得名也

灌田千五百餘畝

石河 在西平門右灌田千五百餘畝

黑池壩 在石河北灌田千五百餘畝

官塘 在城西十五里奇山集東灌田三百畝

官塘 在城西二十里十八里岡西灌田四百畝

李張壩 在城西二十三里井西灌田二百四十畝

老堰 在城西三十里新城南灌田四百畝

姚家堰 在城西五十里長岡店東南五里灌田百

六十畝

蕭家大塘 在城西五十里稍麥岡東灌田三百畝

枯草塘 在城西五十五里雷麻店東灌田千二百

畝

樊家大塘 在城西六十里六十廟西南灌田二百

畝

稍北塘 在城西六十里六十廟東灌田四百畝

大官塘 在城西六十五里青陽鎮東灌田四百畝

花屏澗 在城西七十里方家橋西灌田無畝數

小官塘 在城西七十五里花子岡西灌田千二百

畝

邱家大塘 在城西七十五里白露寺西灌田三百

二十畝

盤塘 在城西九十里雙峯頂東南灌田二百四十

畝

金城河

卽鐵索澗

在城西九十里虞家集北灌田二千

四百畝

孔家大圩 在城西九十里雙峯頂東北灌田三百

畝

沙塘 在城西九十里灌田無畝數

李碑塘 在城西百二十里馬家集東灌田二百四

十畝

普子塘 在城西百二十里王小店西灌田二百四十畝

蔡家墩塘 在城西百二十里南分路口東灌田百六十畝

平塘 在城西百二十里大瀟山西南灌田無畝數
以上西鄉

龍潭港 在城北四里厲壇東北灌田百數十畝
八角塘 汪家塘 皆在城東北六里皆灌田六十餘畝

站塘 在城東北七里灌田百餘畝

陸家陂 在城東北三十里灌田千餘畝

門大塘 在城北七十里灌田四百餘畝

浪陂塘 在城東北七十里石塘橋北灌田千餘畝

黃塘 在城東北八十里花掌集南灌田二百餘畝

徐家官塘 在城北九十里小馮集西灌田五百畝

以上北鄉

陷湖陂 在城東北七十里梁縣東南灌田二千畝

竹絲壩 在城東北九十里小峴口灌田千畝

白小塘 在城東北九十里傅王集西今廢

池家陂 在城東北一百里望梅亭下灌田四百畝

袁楊壩 在城東北一百十里小龍山南灌田千餘

畝

馮家壩 在城東北一百三十里古城集灌田千餘

畝

以上梁鄉

廬屬五州邑合肥地最高恆憂旱不憂澇他邑小
澇則合肥大熟邑境西北尤高憂旱尤甚故宰斯
邑者宜以水利爲政首邑西北去淮幾一驛且水
下於地迤邐數十餘丈勢既不相及東南濱巢湖
圩田倚以爲利而距岡田亦遠不能逆而上輪其

相及可輸以溉者滁肥爲大店步派河次之其間
小水縱橫午貫又不下數十利可以濟然而常不
足者聽水勢自爲渟洩引治之法未盡講也輔常
度邑境廣輪幾五百里山川林麓去二十之一廬
舍墳墓去二十之一疆隴沮洳斥鹵之不可耕治
者去十之一蔬圃菰畦去十之一餘悉蒔稻凡灌
稻百畝須廣十畝深二尋之塘一然後田水均今
廣輪五百里中塘之可名者僅四十有二所餘皆
太半淺小梁北地高三益不治塘堰夏水盛漲無所
容瀾漫泛溢道路爲澤岐流奔注歸淮歸巢畱餘

者無異盂勺兼旬曦赫半龜坼焉此邑之所以常
憂旱也周禮稻人六水之法首潴蓄次防止以潴
寫終之潴令水入防止水出必極盛滿無容然後
寫之務使水鍾稼地乃膏吾苗合邑高地亦各有
汙下可潴歸輪可防能各順其地之勢以大水爲
川以數十小水之縱橫午貫者爲溝爲遂蕩之均
之溝遂之所祇有潴防以納焉則水常足于田可
以已旱實農利之大者或以是役工費重勞姑爲
目前之計於農隙開濬舊塘三五年間漸至深廣
又高出勿栽稻易種梁黍麻菽節水使餘亦未始

非補救之一法云

圩墟

金斗圩 在城內田十餘石

汪夏圩 在城東十里田六十八石屯田二十三石

官城圩 在城東十五里田九十石屯田十石

馬圩 在城東三十里田三百六十石屯田二十五

石

趙墅圩 在城東三十里田三百一十石

楊七圩 在城東三十里田一百一十九石屯田二

百七十九石

鴨劉圩 在城東三十五里田六十石屯田九十石

上大圩 在城東三十五里田一千二百十石屯田三十石

龍潭圩 在城東四十里田一百八十石

宣家圩 在城東四十里民屯田約二百石

小張圩 在城東四十里田六十石屯田四十石

後岡圩 在城東四十里係育嬰堂田

姚埠圩 在城東四十五里田一千二百七十石屯田十石

三汊圩 在城東五十里田一百七十八石屯田十六石

李家小圩 在城東五十里田六十石屯田二十一

石

古城圩 在城東五十里田二十石屯田四十石

上張圩 在城東五十里田六十石屯田一百八十

石

中大圩 在城東五十里田八百石

秀才圩 在城東五十里田三百石

七家圩 在城東六十里田二百石

新圩 在城東六十里田七十石又屯田二百三十

五石

下大圩 在城東六十里田四百五十石屯田四百六十石

大張圩 在城東六十五里民屯田七百二十石

臘樹圩 在城東六十五里田五十六石

羅家圩 在城東七十里田一百石

以上東鄉

楊坡圩 在城南二十五里田七十石

上張圩 在城南三十里田二百七十石

下張圩 在城南三十里田四百一十石

下大圩 在城南三十里田一千四百石

繆家圩 在城南四十里中派河東田三百石

楊家圩 在城南五十里田一百石

徐家圩 在城南五十里田八十石

白露圩 在城南五十里田一百一十石

黃小圩 在城南五十里田五十石

尖堦圩 在城南五十里田一百石

牛角大圩 在城南五十里田一千石

牛角上圩 在城南五十里田三百石

西圩 在城南五十五里田一百石

蓮花圩 在城南六十里田六百石

馬鞏圩

在城南七十里田六十石

西泊圩

在城南七十里田九十石

南泊圩

在城南七十里田七十石

永成圩

在城南七十里田二百三十石

龔家圩

在城南八十里田一百石

孫家墟

在城南八十里田八十石

方家墟

在城南八十里田六十石

俞家墟

在城南八十里田六十石

周家墟

在城南八十里田五十石

慈家墟

在城南八十里田九十石

三里圩 在城南八十里田一百六十石

新稍圩 在城南八十二里田一百二十石

阮家圩 在城南八十二里田一百六十石

沙灘圩 在城南八十五里田三百六十石

高坡圩 在城南八十五里田二百石

同大圩 在城南八十五里田一千石

馬廠圩 在城南九十里田六十石

南林圩 在城南九十里田八十石

東灣圩 在城南九十里田三千六百石

西城圩 在城南九十里田三百石

義城圩

在城南九十里田三百石

臨岡圩

在城南九十里田六十石

東城圩

在城南九十里田七十石

魚圩

在城南九十里田九十石

四合圩

在城南九十里田一百石

王家圩

在城南九十里田二百石

新圩

在城南九十里田二百石

楊坡圩

在城南九十里田三百四十石

魏家壩圩

在城南九十五里田四百石與舒城廬

江縣三分

沙蕩圩

在城南九十里田七百石

西灣圩

在城南九十里田一百石

姚家圩

在城南九十里田三百六十石

義興圩

在城南九十里田三百二十石

東興圩

在城南九十里田一百六十石

任倪二圩

在城南九十里田四石

殷阮二圩

在城南九十里田一百五十石

後灣圩

在城南一百里田四百二十石

施家灣圩

在城南一百里田一千石與廬江縣分

新燕圩

在城南一百里田一百石與廬江縣分

石頭圩

在城南一百里田三百石

廟城圩

在城南一百零五里田九十石

馬河圩

在城南一百零五里田五百石

黃姑圩

在城南一百一十里田一百五十石

創興圩

在城南一百一十里田六百二十石

永熟圩

在城南一百一十里田八十石

蘆子圩

在城南一百一十里田六十石四面皆廬

江界惟本圩屬合肥

以上南鄉

合肥縣志卷第四